

漳州府志卷之二十二

人物二

明列傳

經濟

直節

清介

才能

循良

經濟

謝 璉 潘 榮 周 宣 吳 原 魏 富

洪 異 戴時宗 蔡 文 朱天球 吳 善

盧岐嶷 石應岳 柯 挺 王命璿 何 楷

謝璉字重器龍溪人宣德丁未廷試第三人除翰林

院編脩試詩稱旨嘗從謁長陵獻陵對述稼穡閭閻

利弊甚悉丁艱服除與脩宣宗實錄及令典聖鑒日

漳州府志

卷之二十二 人物

一

曆諸書因災異陳言請出宮人又請赦諸無辜及除

連坐法尋遷侍講正統十四年上言時政十五事

一曰

脩陵寢以敦孝道二曰練將兵以脩武備三曰壯關

隘以防不虞四曰謹災異以回天戒五曰恤饑寒以

周編戶六曰峻內治以杜外患七曰優元老以專責

望八曰近儒臣以充德業九曰興勸農以足衣食十

十二曰擇巡撫以慎風憲十三曰嚴薦舉以息奔競

十四曰尚廉恥以敦士習十五曰周窮乏以行仁政

中言石亨不可專任尙書于謙知軍旅老臣胡濙堪

付托事後若懸鑑而築城龍巖建守禦亦璉所議也

秩滿陞南京戶部右侍郎創便宜六事爲經久可行

之規明年兼掌兵部務時戶部郎陳秀坐誣下獄璉

-10 190 29 940" data-label="Text">

力爭之秀乃得脫景泰癸酉以疾卒于官詔遣中使



莅喪諭葬祭故事翰林居養優地徒以筆翰相高慷慨論朝政自璉始著有奏箋百餘卷及玉堂藏集潘榮字尊用龍溪人正統戊辰進士景泰元年授吏科給事中凡叅駁彈劾務存大體時言事者多觸忌諱詔禮部看詳有礙者治以罪榮疏言陛下初卽位務開言路今此令下天下將謂朝廷以言爲諱上是之學士倪謙丁憂謀起復榮疏斥之謂三年之喪古今通義謙聞報日久逗留京師意圖僥倖經筵風教所關豈可使若人列侍左右聞者快之天順六年奉使封琉球宣布朝廷威德復命擢本科都給事中成

漳州府志

卷之二十二 人物

二

化六年陞南京太常寺少卿尋遷南京戶部右侍郎督糧儲復改南京都察院右副都御史仍總督糧儲兼理屯田事制奸剔弊得羨餘米數萬斛以備賑濟入爲戶部侍郎特旨掌部事時兩浙責償鹽課甚急人以其爲病特奏免之會漕運蹇澁命往視漕糧運畢通陞南京戶部尙書乃乞骸歸卒于家贈太子少保賜葬祭榮爲人寬弘平易不言人過而澹然無所嗜家廟中朔望時祭必躬曰我居官四十載事先之禮多闕所自致此耳鄉人以爲法

周宣字政舉龍溪人正統乙丑會試第三人授戶部

主事時車駕北征糧草浩繁欽限甚急衆莫敢任宣奉命放支不日事畢及爲潮州知府海寇黃于一等爲亂燒劫揭陽縣二十四村民皆從之宣督兵擒殺賊不敢出宣謂盜魁旣得餘可撫而下也乃自詣賊營撫諭賊乞降因遍歷各村放回被擄男婦招撫良民千餘家已而山賊羅列寧等復集聚爲亂劫惠州宣出不意搗其巢穴大破之時湯田黃寨等處皆從賊省臣欲乘勝盡殲之宣謂脅從罔治全活以數萬計賊平當道以宣漳人漳潮密邇奏改調宣民泣留不能得乃羣赴闕上疏乞還宣然新守已出京矣旣

漳州府志

卷之二十二

人物

三

而海寇復大亂攻圍縣治殺通判指揮潮士民白當道曰事亟矣必周守復來乃定當道具書請宣宣慨然爲行入境乃開城門納逃難諸良民出榜約日招降至期各賊駕船數百艘來皆披堅執銳宣謂曰若欲從良何爲爾爾於是投戈羅拜宣單騎詣賊巢遍歷二十四村且慰且諭歸擄掠七百餘人海濱有淫祠賊卜神以爲從違賊旣約降猶豫宣問之曰卜不吉宣曰第再卜之宣乃夜告神祠民欲從良神何告以不吉其不知有順逆乎次日賊往卜報曰吉宣使人覘之猶圍營結寨如故宣告當道曰賊可滅矣欲

降而猶豫衆不爲用矣遂一鼓而殲之潮地悉平事聞朝廷遣官賞勞陞山西行太僕寺卿賜三品俸丁母憂卒于家宣少有文名家貧銳學或行路潛思不他矚遇所意愜輒笑不止人以爲書顛其爲詩文多出新意自成一家言所著有易齋課若干卷

論曰英廟以來北鄙治戎麓川違命陳善策葉宗留鄧茂七輩相繼並出浙閩躡焉天下岌岌急需良才政舉有治賦之能功績已著而僅處以太僕非其任矣余故不能不爲鄜王曹張諸君子深歎息也

漳州府志

卷之二十二

人物

四

吳原字道本漳浦人天順八年進士拜兵科給事中首陳正心任賢重爵賞節用度斥異端五事上嘉納焉成化四年與同官上疏請溥恩惠廣嗣續以議切宮闈被譴十五年進都給事中初置西廠以伺察中外原以非祖制請革之安南窺滇女直侵遼原乞罷守臣貪恣誤國者又論大臣諂附西廠者爲所中久之始陞太僕寺卿繼陞戶部侍郎總理京儲先是竊取芻糧事覺箠擊幾死始畀之理原曰律有正條奚以箠爲竊者感之而止親藩軍校至縛官吏自放支祿米原曰此尚知有三尺耶嚴寘之法弘治五年兩

浙大水民饑奉勅兼左僉都御史往視之至則宣朝廷德意搜求民隱勸分平糴共積粟三十餘萬石銀七萬餘兩且積且賑又奏蠲累年逋負民賴以蘇築海堤塞礦穴嚴生女不舉之禁民德之明年召還以疾卒賜鈔給驛還鄉復遣官諭祭董葬事原善記憶凡奏牘累萬言默視至再輒能舉其辭公暇手不釋卷尤精左氏春秋其著述有南行稿浙巡錄奏議共若干卷

魏富字仲禮龍溪人成化丙戌進士授監察御史巡按廣東時林蠻洞蜒爲厲富下令廉得不法吏置于

漳州府志

卷之二十二

人物

五

理蠻蜒皆復歸編戶遷浙江僉事陞副使縣健令有爲豪橫所誣者直而釋之蕭山諸暨有石塘岸水礮善崩募工伐鉅石脩築之嘉湖寧台薦饑富親往發粟以賑仍積粟以爲後脩陞江西按察使繼擢右僉都御史巡撫順天畿內中貴人及將領守臣多操利匿亡互倚爲援富部分將領授以成算一時無敢犯者疾作乞歸后起南京大理寺左少卿明慎庶獄正德改元陞刑部右侍郎是時年已七十三疏乞休給驛而歸歷仕四十餘年隨事盡職未嘗立異取名而所至輒以譽終親不遠巡養終身孺慕疏水自甘分恤

宗族人以爲有平仲之風焉

洪異字大同龍溪人弘治乙卯舉人授通州學正分考應天權知崇德縣嘗擒江淮劇盜除數十年之患開天長河通江湖數十里以溉田萬餘頃擢監察御史執法敢言巡按粵東檄海道汪鉉平海寇之亂嶺外以安陞四川僉事以母老乞終養服除起浙江僉事陞廣西僉議鎮靜自持不嚴而法年七十乞歸優游十有七年乃卒異和而正言不及私家居未嘗以事干有司鄉里高之

戴時宗字宗道長泰人正德甲戌進士授刑部主事

漳州府志

卷之二十二

人物

六

有緹騎殺人尙書欲曲庇之時宗執法不假借調吏部考功主事武廟南巡與同舍郎張衍慶等諫留忤旨罰廷跪三日杖三十直聲由是起歷考功文選郎中詹事霍韜薦起給事中陳洸旨下吏部時宗持洸不可用霍由是止人兩高之南都缺大司馬執政欲用王瓊時宗不署奏曰王固有才然與彭澤皆邊方得罪之臣王遽復本兵功罪不明不可旋遷大理寺左少卿行人薛侃奏建親藩入侍上震怒下法司庭鞫之時宗力言侃狂瞽不足深罪事得解所開釋株連者甚多遷都察院右僉都御史巡視河道時宗到

濟上凡水受病處躬行詢覽條上三策行之適邊警特旨改提督薊州軍務星馳赴鎮敗之密雲敗之馬蘭谷又奏革黃花鎮鎮守內臣未幾罷歸臺諫薦起巡撫勛陽時旱蝗相繼餓殍盈野大發穀賑給佐以軍儲增築勛陽鎮城改置上津縣廟川堡于要害地皆碩畫以平竹溪金川賊賜金幣旋陞都察院左僉都御史被誣回籍杜門不出臺省交章薦之竟不起時宗少負經綸應變之才老而愈練所至皆有恩澤及民精于聽斷吏不敢欺爲詩興致清遠文亦廓達莊雅成一家言自命朽菴存稿行于世

漳州府志

卷之二十二 人物

七

蔡文字孚中龍溪人嘉靖丁未進士授翰林庶吉士出爲兵部主事歷陞廣西叅議治柳州柳故雜俗文以德化之多懷服土舍羅護強據羅城二堡侵民田數百畝當道不能制文曰是頑冥負固不可長乃躬往莅勘護率兵露刃睨立文不爲動宣恩威責之遂焚堡舍田而去未幾潮寇猖獗總督傲署蒼梧分守賊定轉府江副使時徭賊出沒道不通文大布威信令其僉領互相鈐束三載無竊叛者遷江西叅政治贛州以與征嶺北功賜銀幣遷浙江按察使河南右布政使尋轉貴州左布政使未至境會督撫調兵征

水西僕人云公期尚遠兵務倥傯可避行文曰焉有是哉星夜馳之至官兵已敗文乃設方略撫戢之士會以平陞本省巡撫貴故跨連滇蜀楚粵四省諸徭獷悍而都勻麻嚮大華三酋尤憑險跳踉乃督兵大征嚴令誓師不妄殺一人凡三奏捷會以母憂歸遂杜門簡出年六十五卒于家文天性沈毅砥厲風節當浙臬時內臣李佑以督造至妄以尊臨三司文抗不爲屈江陵柄政文以同年恥攀附尋常寒溫而已家居湛約著述自娛其遺稿有一得語聞見錄職方抄及集稿數十卷

漳州府志

卷之二十二 人物

八

朱天球字君玉漳浦人弱冠登嘉靖庚戌進士風節自持授南京工部主事滿考入京會楊忠愍論死西市天球招同志薛天華楊豫孫董傳策往哭之爲治具當日有四君子之稱歷南駕部及禮曹郎擢湖廣僉憲分守湖南丁艱服闋補粵東屯鹽僉事移督粵西學政陞浙東分守叅議山東督學立四隅社學定諸講章及家禮易簡編頒布傳習所取文義黜浮崇雅于時東土斌斌得士稱盛擢南京太僕寺卿莊皇帝登極天球入賀值給諫石星言事忤旨廷杖因上疏乞廣容納宥狂直以隆聖政激切千餘言京師相

與語曰朱公向履虎尾今批龍頷矣越明年外調拂衣歸治草舍于邑郊之南十餘載不入城市令房裏時候之傍舍以邑乘請天球乃集諸掌故裁定之朝廷念耆碩起天球副粵東臬旋內召南京太常寺少卿屢遷至工部左侍郎辛卯南掌院缺朝論以天球克持風裁陞南御史大夫俄遷南工部尙書癸巳留都計吏與冢宰評騭僚屬互有得失遂以直掛忌者之口上疏乞骸請之再三乃得旨予告年八十三終于家贈太子少保賜祭葬如禮所著有湛園存稿若干卷

漳州府志

卷之二十二

人物

九

吳善字元夫龍溪人嘉靖壬戌進士初授刑部主事恤刑廣東多所平反擢永寧兵備諸獍多反覆乃夷其巢柵列爲編民建市屢通鹽法教樹藝於是獍悉向化以軍功擢按察使再遷廣西右布政轉江西左布政萬曆癸未擢應天府尹尋以副都御史巡撫廣西時府江徭叛平樂兵又告變所在焚掠議者謂宜姑緩撫之善曰養驕寇如養疽不治將深遂調集將吏躬入險阻斬馘以千計諸黨悉平丙戌陞南京工部侍郎未幾以少司馬督兩廣軍務軍旅民瘼措置詳覈已而遘疾海南黎徭叛力疾運籌形神困憊遂

卒于官時傳署中有光如斗上出半空而滅

論曰聞之父老云元夫多才而任質不事脂韋當
粵中叅藩時江陵聞其名欲以邊才不次擢用元
夫不爲動若木彊者竟以此忤江陵意幾爲撫中
然旋亦秉節鉞窮通有命勁節足貴矣

盧岐嶷字希稷長泰人七歲能文博極羣書督學江
以達闕其李固杜喬論嘆曰吾當避此子一頭地嘉
靖甲辰進士授歸安令節冗耗立三等法均差役聽
斷精敏凡村落中有隱語皆知之遷戶部主事旋改
兵部郎具劄戎政條上平倭三策爲萋菲所中外謫

漳州府志

卷之二十二

人物

十

久之起僉臬江西賊寇臨江岐嶷親爲轉戰斬數千
級平之轉雲南叅議豺寇作亂殺憲臣及郡倖猖獗
殊甚岐嶷提兵深入寇望風而靡乃縱反間開納叛
散印票數萬懸之樹杪令欵者執以爲信于是黨與
殺鳳繼祖以降以功超擢貴州按察使未幾又爲同
事者及沐府構孽竟解官歸角巾私第課子談經爲
文宏博古雅自名吹劍集

石應岳字鍾賢先世以武功爲龍巖所百戶至應岳
始以儒業起家隆慶辛未成進士讀書中秘補禮科
給事中擢長戶科以外艱歸嗣起爲禮科都給事首

疏請祀大儒陳真晟于鄉他所條奏如經筵請史官入直應時登記得失又若廣宗藩之便宜節尚方之賚予急脩省之要圖後先十餘疏鑿鑿可行其論科場事謂典省試宜用京朝官後因爲例秩滿陞太僕少卿嗣長南太僕馬政倍肅晉應天府尹會海忠介瑞爲御史大夫相衿契都人有總憲清似水京兆白如霜之謠改順天府尹值潞藩就國所部驛騷賴岳主持其間公私便之奉勅之留京提督操江協理院事擢貳司馬東南倚爲長城已復有詔召入爲少司徒岳念母老乞終養不許會言官有吹毛之者應岳

漳州府志

卷之二十二

人物

十一

欣然曰余今乃身爲親有矣有旨調留京乃遂歸杜門岳奉身甚約處世甚溫未嘗以意氣加人里居謝絕塵務郡國吏希獲識面野老卽之不知其爲公卿也嘗非汲長孺之斥平津謂三公雖尊若脩潔持躬寸絲尺帛將何自致布被固其宜耳應岳家甚貧沒無餘產所著疏草文集若干卷刻于家

柯挺字以拔海澄人以貢入北雍萬曆癸酉舉順天第一庚辰成進士授南樂令減徭役鋤豪強剔衙蠹庭無留獄盜不窺境迨入覲署事者以盜告逮七人皆誣服挺至察其冤密踪跡盜于清豐縣境得之七

人者皆得白行取拜陝西道御史上疏辨賢奸請逐都御史雒尋從祭獻陵時壽宮經營費帑金幾二百萬矣有上書請他移者挺周遭相視良久曰是吉壤也所不如法者向耳詔詣壽陵面對咫尺帝座條答自如尋賜食御史召對賜食非常典也歲丁亥大稜疏請發臨德二倉粟二十萬石賑之出按楚值勛陽兵亂馳入境誅三卒以殉變始定歲饑設粥賑民議處宗藩祿米平亂賊劉汝國等楚人德之旋督留都學政所鑒別皆知名士丁內艱歸癸巳京察爲山陵議相左者齟齬之遂謫補外堅卧不出樂建安山水

漳州府志

卷之二十二 人物

十三

徜徉其間因家焉年七十四卒海內門人故吏生芻絮酒百舍重趼于霞山劍水間百年來稱希覲云王命璿字君衡龍巖人萬曆甲辰進士起家新會令以清廉內召擢陝西道御史歷官至刑部尙書抗直敢言當萬曆之季東宮岌岌命璿入西臺卽首疏請福藩就國又請預教東宮然終與闈寺角屢起屢躓蓋時魏璫權傾內外幾危廟社凡闈兒媚子布滿天下璿日與齟齬吾故幾羅不測高案者閩稅璫也橫于閩璿劾之案撤回曹化淳者司禮監也嘗欲見璿璿不往會朝廷詔三品官面對策考選入閣璿對稱旨

已報卜金甌化淳間之命格不下及署刑部尚書有
鄧希詔者權璫也守口失機爲邊帥所揭璫據供報
之詞連內侍遂忤中貴意以冠帶閒甘命璫雖抗直
然每委曲敷陳獨于中貴不能少假至臨事能因時
措置多成功其爭東宮也一時言事者咸劇切宮闈
語不無少戇故疏多留中璫第請福藩之國至言青
宮則云冊立可俟明旨而預教宜速早行雖極言而
人主不怒其署刑部也天子用法過峻網已密矣命
璫輔以寬厚時開廣上意多所矜釋遂能出錢謙益
等于獄又嘗按廣時海外盤踞東南巨艦輒以貿易

漳州府志

卷之二十二

人物

三

入會城命璫恐生異變又知互市之議終不可奪乃
上請設澳門叅戎以增防守禁互市者毋踐入內地
以防不測亦使朝廷知互市非計又占城交趾暹羅
諸島海舶亡命者陰結之頻出沒爲患璫親按部規
畫守禦星羅碁市如長城窺伺遂絕嗟乎命璫以經
濟之才遭時不造羣小憑權老成棄罷而二三君子
又堅持蜀洛水火相將天下尚可爲哉甲申聞變北
面號聲乃遯逃于萬安之番嶺雜處村農間竟死山
中命璫精于史著有史傳論贊及奏疏文集二十卷

康熙五十年祀鄉賢

續傳

何楷字元子漳浦鎮海衛人生有異質書過目不忘天啓五年登進士時魏璫肆毒朝紳楷不謁選而歸崇禎時起戶部主事權滸墅關事竣進員外郎七年詔簡部曹爲言官大臣多推楷改刑科給事中流寇陷鳳陽燬皇陵楷疏劾撫臣楊一鵬按臣吳振纓下獄語侵輔臣溫體仁王應熊旋復劾兩人朋比行私言振纓爲體仁私人一鵬爲應熊座主情面重則祖宗之陵寢爲輕朋比濃則天下之刺譏不恤語甚切至忤旨鐫一級復疏請罷內操上不從是時上憤在廷之臣多貪庸顧身家視君國輒泄泄思欲痛整

漳州府志

卷之二十二 人物

古

齊之于是詔獄繁多司寇諸曹日不暇給有言者上疑爲偏護舉朝皆結舌無敢言楷乃疏陳慎刑八議娓娓千言援祖制明國典寄匡救于將順之中天子知其諷切也一時獄稍寬楷自以身爲言官不得默朝廷每有大事時政有得失嘗侃侃敷陳議保舉言擇相請停秋決及言海寇宜勦併駁諸大臣情弊卽皇陵一案楷已得罪尤復再申前說謂二輔輕視祖宗勇護私黨政本何地相率爲比尤而效之樊將何極及應熊陳辨楷復駁其明旨未下應熊何知置辨必有往來偵探漏洩禁中諳者應熊竟由此罷去

蓋天子亦知其敢言也雖不能悉從然顧心志之屢遷
工科都給事中時火星逆行天子減膳脩省兵部尚
書楊嗣昌方主欵因歷引前史熒惑帝意楷疏駁其
立言本心附會罔上及嗣昌奪情柄政楷又疏劾其
忘親與黃公石齋劉公晉卿趙公景之林公自芳先
後糾叅長安謂之奪情五諫云再鐫二級調南京國
子監丞旋丁內艱乃歸復講學于紫芝書院服闋諸
大臣請復原官不聽既而國用匱乏朝廷思用鈔乃
召楷問鈔法至南都而京城已陷矣會福王在江南
擢戶部右侍郎兼工部管錢法馬阮爲政國事日非
漳州府志

卷之二十二

人物

五

屢疏乞休不報南都陷乃間關至閩閩中擁立唐王
起楷戶部尚書旋改都察院左都御史與鄭芝龍不
愜請告再三王欲兩全之暫令回籍歸至中途遇盜
截其一耳蓋芝龍使其將楊耿爲之也後漳州不守
抑鬱以卒楷博綜羣書寒暑不輟尤邃于經學所輯
周易訂詁詩經世本最號精博春秋釋尚少四公然
皆爲學者所傳云

論曰宣正以後歷嘉隆人才輩出鉅卿總憲監司
類能因時濟變隨事立功其經濟之選歟戴宗道
之諫武廟朱君玉之哭忠愍君子尤躉之至若王

君衡者忤璫不屈卒能自立甲申之後遁逃全志
非獨以才也故與元子並殿諸君子之後欲使世
知所以全其才而遭時變徒以經濟名者愧矣
直節

王源 張寬 楊釜 陳宏 沈源

林梅 唐堯欽 蔡時鼎 吳顯 林鈞

馬鳴起 盧化鰲 丘懋煒 蔡夢說 楊聯芳

王志遠 戴仕衡 周起元 林秉漢 劉其忠

盧經 魏呈潤 涂仲吉

王源字啓澤龍巖人永樂甲申進士選庶吉士出知

漳州府志

卷之二十二

人物

六

深澤縣累上疏言民事有旨召用陳時政謂母苛刻
以害政體母黷武以妨農功聽邪諛則忠讜無聞好
異端則正道斯泯時有西僧見幸故源及之上怒下
錦衣獄會赦復原官陞春坊司直郎時仁宗爲太子
源侍太子與諸王方講說王他顧源正色曰臣所講
皆治平要道不足聽耶王爲改容及仁宗卽位改衛
府紀善尋遷松江府同知奏罷重額及逋負糧數十
萬石時刁民楮路等誣奏左道二百餘家逮繫甚衆
源悉平反之以母老乞終養服闋入爲職方郎中出
知潮州府政聲益著潮地卑下源度地計工爲築長

堤郡有虎暴源方募人捕之虎渡惡溪去矣致仕歸潮人祠祀之年八十卒著有韋菴集詩傳補遺家禮易覽及異端辨

張寬字周弘南靖人景泰辛未進士爲御史直言敢諫天順元年以劾總兵官石亨忤旨下獄值天變得釋出知安定縣禦寇有功卒于官寬力學好義領鄉薦後嘗捐穀三百石作南山陂千餘丈又割地爲圳萬餘丈以興水利鄉人至今德之

楊釜字受調長泰人志行耿介登景泰甲戌進士授御史巡按山東浙右糾察甚嚴權幸無所避按浙時

漳州府志

卷之二十二

人物

七

閩尹擾民民苦之閩所挾有違制龍鳳匹段及銅鶴等物釜按得其實遂劾之又有時宰橫暴莫敢指陳釜復廷劾之直聲大振以母憂歸里宦橐蕭然卒之日東魯浙右聞之皆泣下續傳

陳宏字丕道龍溪人

今海澄

天順甲申進士拜監察御

史視兩浙鹽課及按淮陽諸郡揚清激濁風裁凜然成化間彗見詔求直言宏與御史林誠等交言商輅當康定朝不能保護儲位不宜復當國願罷輅以謝天譴及論都御史程信剛愎尙書姚夔黷貨公論壯之遷湖廣按察司僉事沅江有豪民與人爭貲產聚

黨持兵器鼓噪宏按法誅之又討巨賊封敬中于洞庭以功超陞副使丁母憂卒于家宏剛直敢言處事詳練權貴憚之方擬大用而年不竟志識者恨焉

沈源字澄之龍溪人

今海澄

天順甲申進士爲南京監

察御史守正不阿多所建白嘗疏薦編脩章懋理學及論劾郎中陳雲不法事廷論避之又因天變疏陳脩德弭災十事皆譏切朝政旣而巡視上江留都諸勳貴怙寵肆行源法嚴令肅一以三尺繩之勳貴人不能堪因連結交䟽詆源貶盧氏令臺省交章救之弗能得源至盧氏興學均徭節費清訟政教大行于

漳州府志

卷之二十二

人物

六

是當道特薦大用而源卒矣百姓哀慕建祠祀之嘗傳其詩有云衮職曾無一字補螢窓空讀十年書清宵步月數圓缺白晝看雲任卷舒蓋鬱鬱不得志云林梅字以和漳浦人嘉靖八年進士歷戶部郎中督課江州覺察內帑僭運糧儲所至持正不撓坐忤權貴出知秦安州歷慶遠南安二府同知陞南京禮部郎中卒于官爲人慷慨多直節人爭重之

縣志補入

唐堯欽字寅可長泰人隆慶辛未進士授中書舍人選工科給事中觸時感事多所建白轉兵科左給事中主試四川得士稱盛遷刑科都給事中有錦衣鄭

承憲乞父鄭福葬地福皇貴妃祖也上給與墳價五
千兩欽上疏力言祖宗成憲妃祖無與葬之例祖既
如此父當何如妃祖如此后祖謂何將來紛紛陳乞
豈有底止上不從然貴戚肅然憚之司禮監張鯨怙
權黷貨事發上罪諸黨附者念鯨侍奉年老姑准策
勵供事欽抗疏謂黨附之罪皆鯨罪也羣奸伏辜首
惡獨庇法安在且中外藉藉不聞公道而聞厚賄陞
下以賄罪鯨復以賄用之乎語觸忌甚危時與同官
李沂疏同上上大怒明日旨下杖沂六十而欽姑免
究旋陞太僕寺少卿條陳馬政鑿鑿可行遷南京太
漳州府志

卷之二十二

人物

九

僕寺卿以人言拂衣歸居家儉約性孝友分產給諸
弟姪卒賜祭葬所著有崖略篇

蔡時鼎字台甫漳浦人萬曆甲戌進士歷知桐鄉元
城二縣兩邑刁醇異俗時鼎一以勤慎廉約勸學爲
質吏民各悅而安之旋擢雲南道御史首劾太和山
提督內監田玉不宜兼分守及不法狀貂璫憚之差
視淮鹽疏列惠商裕課十事次第舉行積例金捐助
開河之費及置各屬邑學田以濟貧士差竣回道值
順天主試者中飛語引繩批根鼎力疏救之詞侵中
官忤旨謫馬邑典史旋以直聲蔚起量遷太平推官

歷轉南京禮部郎中復疏陳時政萬餘言譏切執政及中貴人用事者不報然幾劓虎牙矣卒於宦邸年方四十三囊懸如洗留都士大夫捐資爲殮時鼎鼐麟多節疾惡至嚴尤精於摘發吏不能欺直道如矢有才無命惜夫

吳顯字景猷漳浦人萬曆甲戌進士初知六安州時高郵寶應河堤壞總河難守郵者特疏以顯請遂更調拮据五載脩越河築老堤植柳護之三堤屹然江陵相方厲驛禁其太夫人道過郵役驛夫八百餘名顯力裁之相家奴據署詬誶誘顯登舟出數婢子奪

漳州府志

卷之二十二

人物

三

其州印去顯曰州太守奉汝家相君法何絮也直指監州聞之頓足歎曰大不諳事急馳解得罷然江陵不罪也遷比部員外郎陞江西僉事歷廣東副使所至有伉直聲道不諧俗竟左遷以疾乞歸顯端方耿介恥隨流俗而愛人下士忘其貴倨士紳多嚮慕之林鈺字寔甫龍溪人萬曆丙辰進士殿試第三人除翰林院編修歷官國子司業署監事監有銅鼎銅缸爲臨雍會食及貯水脩火之器逆璫方熾欲假鑄錢鈔不與旣而諸生陸萬齡傳璫意欲就太學中建祠祀璫及其父以方孔子叔梁紇鈔持不可萬齡就手

中奪啓事以去明日有旨責鈺閒住鈺翩然就道無
悔容崇禎卽位復原官累陞侍郎兼侍讀學士七年
以枚卜召對陳用人理財靖寇寧邊四策卽日拜東
閣大學士入閣辦事時上方疾黨人以鈺誠慤不立
門戶特加眷顧首輔忌之困以煩劇遂以勞得疾而
終鈺爲人冲淡和平廉介自守鄭芝龍受撫奉千金
爲壽鈺却之復其書曰成人之美君子也因之以爲
利非君子也芝龍亦歎服其量卒諡文穆

續傳

馬鳴起字伯龍龍溪人爲人類椎厚長者然遇事抗
直敢言庚戌登進士授浮梁令多政聲調新建復內

漳州府志

卷之二十二

人物

三

召爲湖廣御史時流寇充塞經撫交捩不力朝論久
未定公在臺主讞曰爲疆臣寇至無逃有死經撫喪
地躲身何所短長乎熹宗旣立保母客氏比魏璫權
傾中外一日以公論出宮復趣之旨甚悲慕廷臣上
疏輒被呵譴鳴起乃抗言祖宗家法親王長卽就封
太子冊立卽居東宮家人之間最爲嚴肅今客氏一
保姆長居禁地壞家法不便一宸居宥密慎關防永
巷之人恣意出入不便二且女德難終婦愛不極旣
乖貫魚小星之序可無履霜堅冰之虞不便三又有
權璫操其線索涓涓不已將成江河不便四出入非

時外廷必爭爭必激激必逐以保姆逐言官累聖德不便五事關國體責在輔臣不便六疏上璫摘線索語大怒傳杖一百時葉福唐猶在閣力爭之得不死初上以鳴起樸忠嘗使視屯馬事竣命督學北畿鳴起之督學及視屯馬皆踵左浮丘故與浮丘相得甚歡而趙高邑為太宰鳴起布其文於學宮會高邑逢羣怒而浮丘以攻璫得罪鳴起亦罷職歸時璫焰將焚鼎海內名賢羅織盡矣周仲先已被逮鳴起未仕時嘗夢值一綽版書西曹法從名與仲先相亞及仲先沒羅織者猶未已又得鳴起所議三案事甚多緹

漳州府志

卷之二十二

人物

三十一

騎且旦暮出鳴起殮寢如常謂所親曰卽不測命耳無負諸君子居無何懷宗卽位諸黨殛去乃起鳴起大理寺丞隨擢左通政乞休不允乃改南太常尋陞總督江南七省糧儲兼理軍務戶部右侍郎左僉都御史又晉右都御史掌南都院事鳴起聞賊陷和州乃兼程歸與諸卿論防守又頒保甲書勸富戶積穀請諸宗勛宦蠲助萃脩于是留都宴然未幾部推冢宰命未下而鳴起卒矣上聞之予葬祭贈太子太保

謚忠簡

續傳

盧化鰲字爾騰漳浦人萬曆丙辰進士歷蘭谿婺源

旌德三邑令以巡撫周起元題薦陞戶部主事尋改吏部文震孟揖之曰朝中素耳勁節今日賴公主持魏璫聞而忌之值楊璉左光斗之獄併誣化鰲遂與璉等二十七人同日下獄削籍歸崇禎初錄用東林諸君子起化鰲原官以清慎轉郎中因病乞休已離官有警留京師感時事因極論古今得失興亡之故君子小人陰陽消長之機著爲盧氏易傳以歸續傳丘懋煒字以鄂漳浦人萬曆甲辰進士授行人奉使冊封藩賜一無所受擢兵垣上屯田馬政及備倭八議復疏言東林諸賢恬志息機潛脩道德何嘗自爲

漳州府志

卷之二十二

人物

二十三

標榜今愛東林者一言不爲東林便斥爲小人之黨疑東林者一言稍爲東林遂加以依附之名如中有物執而不化孰若各捐成心共偕大道以保全善類乎時神廟享國日久羣闖多媒孽東宮者乃復上疏乞罷東廠又疏陳鄭國泰十罪請斬之以謝天下由是直聲振朝端先是代庶子爭立懋煒援隱桓大義責之爭賴以息未幾丁外艱歸起補少叅分守惠州與制府許弘綱不合拂袂歸再補虔州有守虔八議虔歲有常例金八百應入于官悉捐之以供宗室無祿者秩滿晉粵東臬副遂致仕嘗倡築杜潯堡砌石

路置義塚鄉人立生祠以報焉

續傳

蔡夢說字君弼龍巖人萬曆甲戌進士以中書擢御史巡按江南劾西陵侯籍田千餘畝築銅陵堤以廣水利至今呼爲蔡公堤及按廣東戢撫瓊饒諸寇又造湖城石梁以禦水患尋予告歸家未幾復以宿望起海南道兼督學政轉南韶參政會交彘襲欽州制府意尚首功說嚴止妄殺稍有異同上疏乞歸乃結廬郊外謝絕城市說爲人清介端亮風節稜稜人不可犯凡所至皆有規畫每遇淫祠必毀之時論稱其守正嫉邪又能於鄉閭多所砥柱故從來鄉紳特祀

漳州府志

卷之二十二

人物

十四

于鄉者自夢說始

續傳

論曰余聞之先輩言夢說當予告時常爲鄉里陳時弊有不便於民者必爭之失當道歡不顧近世士大夫唯唯諾諾甚或爲之逢長然亦以此取輕嗚呼救邪起失當道甚望有士大夫豈盡嫉之哉若夢說者知且賴之矣

楊聯芳字蘅苑龍溪人生穎異書過目輒成誦萬曆辛丑成進士授行人出知杭州正直不避權貴有大僚子姪驕橫犯法聯芳庭笞之豪右皆斂跡遷黔憲爲忌者所中降一級遂致仕聯芳雖抗直顧性真率

坦易卽販夫童子嘗狎對笑語無貴容曰吾居鄉故也惟閭閻有不便者陳于當道每侃侃剛氣露眉宇間當道亦以齒德嚴憚之年八十七卒著有諸經纂

註二十四卷

續傳

王志遠字而近漳浦人萬曆己丑成進士出守澧州左遷紹興府倅轉知晉州陞戶部員外歷郎中以不阿贊成大禮至再促入對幾不測坐是九載不徙官已力乞改南得南禮部郎中歷陞湖南叅政分守長沙寶慶時宗祿京絹監稅南兌等弊病民志遠窮究列禁之又設法捕岷府用事人匿王宮者械戍之城

漳州府志

卷之二十二人物

三五

且其兩校尉王震棟楚人大快陞本省按察使署楚藩擢四川右布政蠲監稅三萬九千以不滿中丞意爲所劾遷江西左布政拂衣歸家三年乃調河南右布政會遼師潰朝議四省募兵志遠愀然以爲非計委曲調劑以舒民困比兵至京師軍容壯于他省光宗卽位遷廣西左布政議罷閩廣佐運海船令出船價移近地脩造而遼報復至日夜調兵餉竟以勞卒于官志遠性恬淡不營財利歷官數十年常布衣家無私積所著有銀鏤稿意雅涉筆寶簾堂疏稿諸書經解中庸說約王氏四書通行于世卒之後弟志道

列宦績于朝得贈太常寺卿

續傳

戴仕衡字章尹長泰人遷於興化萬曆己丑進士以
新建治行第一入爲吏科給事中年弱冠正直敢言
時上方以靜攝爲高仕衡上言元首股肱宜一體相
通不當隔絕日本乞封朝廷將許之仕衡復抗疏極
論其不可因劾尙書石星欺罔不忠及輔臣趙志臯
模稜不決繼復以屯田習戰足食足兵爲言凡所陳
論數十事悉中時弊惜朝廷不能用也竟齋志以卒
續傳

周起元字仲先號綿貞海澄人萬曆庚子領解明年
漳州府志

卷之二十二 人物

二十六

成進士初令浮梁有大姓欲吞范文正雙溪書院起
元持法不阿士論壯之調繁南昌凡盜發他境匿宇
下者悉捕得壬子授湖廣道御史奉勅巡漕振滯疏
壅公私便焉時臺臣有上疏攻東林者起元抗疏言
東林之學起于楊時今議者欲借道學以攻楊時借
楊時以攻羅汝芳顧憲成皆非是劾去朝貴數人而
方從哲以中旨起少宰不由廷推又疏駁之左遷出
叅粵西值柳慶大饑盜賊蠡起官僚畏縮莫肯行起
元親按其地立遞運法多方處置民以無殍而盜悉
平擢四川觀察未任脩兵通州紀律大肅客兵過懾

不敢譁晉太僕卿時鄒南臯立首善書院兵科朱童蒙詆爲僞學起元抗疏辨之明年起僉都出撫三吳初爲御史時稅璫高家在閩橫征海舶洋貨脅官吏燒殺市民莫敢言起元特疏叅之中璫久已側目至是吳中織監李實以郡丞楊姜不行屬禮誣以罪起元三疏救之實假上供爲名逆取舊額外多至十餘萬又密偵殷戶報爲匠籍吳中大擾起元屢疏叅劾前後所上轉加切至而內監魏忠賢以天下官吏方承順意旨稱功德趨附恐後起元獨每與其黨類齟齬阻其威思有以殺公者會朱童蒙由科臣外轉爲

漳州府志

卷之二十二 人物

二十七

兵備多內援驕橫斃漕卒非法吳民鬪聚生變起元勃然曰天子命我撫民察吏可坐視此等虐吾民耶疏上中旨擢蒙太常削起元職歸里周順昌贈以序曰公去而名益高矣吳人無老少皆隨送涕哭聲塞市童蒙入都出都門迎者多無鬚男子衣服甚麗半纏蟒駿騎是時蒙已竄身璫局矣故矯排擠正人之旨致起元罪旣歸羣兇志猶未厭嗾科臣李魯生劾起元借講學爲名與高攀龍周順昌等朋比刺譏濁亂朝政取李實空印本至京令李永貞具草誣起元阻抑上供冒破鼓鑄逆璫遂矯旨與高周七人同逮

緹使至漳漳士民大驚呼設木櫃於郡四門投錢不
數日錢滿復擁諸緹使相率泣言周中丞寃且貧緹
使亦心服加慰護至都下獄拷掠備至致贓十萬獄
中遺家人書曰吾仕宦二十餘年只有山田數十畝
可供祭祀所購吳中卷籍頗多可檢賣爲餬口費也
遂與高攀龍周順昌宗建李應昇黃尊素繆昌期同
斃于獄所謂後七君子者是也崇禎改元贈兵部侍
郎諡忠愍特祠于郡學之西春秋致祭又允御史袁
鯨請與前楊左六君子同建祠京師而吳之閩門及
清涼山江之右粵之西浙之西湖亦各有祠

續傳

漳州府志

卷之二十二人物

二十六

論曰吾鄉當明季周起元黃道周皆以死著也道
周風宇過峻批逆彈奸盡瘁捐軀自尋一死固其
所也起元之死可哀哉劾璫糾朱爲民請命義正
詞平乃與楊左高魏十三君子後先死于獄有明
三百年元氣至是盡矣起元之學不欺爲本以釋
圭君實自命歷官所至皆有政聲撫吳時江南大
水上六疏賑災免漕吳人至今思之嗚呼又何其
經濟名臣也

林秉漢字伯昭長泰人萬曆乙未捷南宮選庶常轉
浙江道御史所建白皆切中時務按粵東值中使採

珠珠船出沒海中莫敢誰何復引交寇闌入內地棄漢首疏停採欵列七宜罷以消變未萌言甚剴切時權使李鳳橫尤甚秉漢臚列罪狀特疏糾叅虐談稍戢嗣以議楚藩事忤旨謫黔臬從事遂從容引去秉漢剛直不阿未嘗以搏擊邀名然所陳奏皆持大體在西臺時如疏陳大臣引疾謂亟決去留以開積滯如九塞待哺請亟振虛弱以壯兵威如宗室繁多請亟從四民之業恩而閑之以法義乃以成其仁皆救時碩論也既歸築浩然亭讀書以終天啓間上閱諫疏嘉其忠懇贈太僕卿所著有若決草長山集行于

漳州府志

卷之二十二

人物

二十九

世續傳

劉其忠字長瑄長泰人萬曆丙辰進士以潮州司李擢河南道御史具疏陳邊圉事甚悉時魏忠賢弄權楊璉疏忠賢二十四大罪疏久不下忠繼疏力言乞付忠賢法司明正典刑以慰列祖之靈以謝天下之議璉恨甚思中之會忠出按甘肅遠邊騷動璉以爲投荒令自斃矣計稍寬踰年竟削籍歸崇禎改元以直聲起原官未幾丁外艱卒于家

續傳

黃道周贊曰熙朝之慝三發闔豎以宗祏靈雖熾亦替魏璉始煽尚于直瑾九錫將加震出乃殄諸

賢伐鼓則邁陳竇雖蹈水火亦克有救吾鄉之哲
有周仲先長瑄嶽嶽幾以禍駢近關之出自投遠
塞及覩日月用慰親在谷木淵冰視彼宛鳩長松
早凋亦垂千秋

盧經字橋權長泰人四歲能屬對十八補弟子員天
啓釋褐爲行人擢御史所陳奏皆持大體不爲危言
激論及巡按河南鋤豪強貴戚宗藩皆斂手以避驄
馬時萊陽郡王尤橫暴強佔許州諸生莊苗無敢問
者經至卽按其事夜草疏燈忽自碎左右毛竦經揮
筆自若極數郡王之罪乞正典刑郡王訴於帝懷宗
漳州府志

卷之二十二

人物

三十一

怒逮經欲寘極刑侍郎陳子壯禮科蔣觀國力救之
乃繫獄二年遣戍及歸遂與弟偕隱不出云

續傳

魏呈潤字倩石龍溪人崇禎戊辰進士選庶吉士改
兵科給事中嘗論列禁臣愈沮愈厲曰朝廷設臺省
于左右所以斥奸邪輔君德也此輩不去君德何裨
省中目之爲魏長孺竟以直言降補所著有館課疏
草南陔草負土編

續傳

涂仲吉字德公鎮海涂一榛季子生而骯髒喜談節
義時論未之許也稍長入太學聞時事闕失輒頓足
或時爲流涕一日在金陵聞黃道周詔獄時方飲投

觴而起曰仲吉當一行爲朝廷保正士其友人謂之曰君有拯溺之義不度布衣之力將自致于九死之罪願君更思之仲吉歎曰黃公天下之正人也主上又英明天子也黃公見殺則天下之正人去主上殺黃公則朝廷負殺直臣名事無大于此者因舉酒曰今日爲君盡觴明日入京師諫不聽卽藁葬長安門外耳遂間關赴闕上書通政使施邦曜難之曰生有取義之勇不度主上之怒將自致于不測之淵蓋甚爲生危之仲吉作色曰朝廷奈何使選蠕者作納言乎邦曜愕然謝曰生年少見義敢爲老夫耄矣老夫

漳州府志

卷之二十二

人物

三十一

不能當爲君一獲罪疏上仲吉盛陳道周學行敦摯其言雖過戇其意實忠純因引唐宗漢武待魏徵汲黯故事謂主上方欲遠法堯舜奈何知出漢唐庸主下且謂三季之主墜小人之術使賢人君子受黨人之禍以此摧士氣失人心今不宜復以黨人輕殺學行才品之臣上覽疏大怒杖仲吉於長安門外復下錦衣獄鞫指使者錦衣喬可用盛陳刑具仲吉曰吾聞南男子見義而動死卽死耳寧足怖耶可用梭其指盡折仲吉不少挫旣而懷宗亦稍悟乃與道周俱論戍未幾復赦還福王在南都給事中陳子龍薦可

用不報閩中擁立唐王方震孺復薦仲吉自代授御史唐王亡仲吉不食十餘日嘔血死蓋世傳其節義不虛云

續傳

論曰吾漳若宋來黃預忤蔡京劉衍折安石高登斥秦檜余嘉論侂冑光前史焉明世人主多苛刻或權臣專柄闔寺弄權一時諸君子抗節陳忠機觸乎羅網吾漳批領履尾踵接肩摩至以抗直忤上官者難更僕數也北門之簿錦衣之獄痛矣蓋幾幾視前史更烈矣

清介

漳州府志

卷之二十二

三十一

汪凱 郭舒 施惠 陳惠 蘇穗

吳超 吳玘 陳英 鄭復 楊表

林士章 林偕春 王應顯 盧維禎 張佐治

張廷棟 弟 廷榜 蔡杲 陳以珪 曾應棨

蔡思充 陳天定

汪凱字克寧龍溪人永樂癸卯鄉薦第一甲辰成進士授禮部主事撫湖湘之饑陞浙江僉事以清介聞懲奸激濁不避權勢浙人思之凱豁達魁偉善屬文郭舒字端莊龍溪人景泰五年進士授行人廉介耿直人不可干以私嘗使蜀諭祭王贈以金帛不受使

于廣布政張瑄餽藥丸五十枚歸家剖取藥則胎黃
金也舒封固遣人齋還之又奉命邠州督茶州守餽
金曰此故事也舒曰請自我革之遷戶部郎督課蘆
洲諸中貴請乞槩杜不行旋丁內艱起補工部郎中
擢守池州興學勸農省刑息訟而催科若拙以忤直
指致仕歸行橐蕭然家居手不釋卷迹絕公門淡泊
以終

施惠字師僑龍溪人應景泰七年貢任武強知縣清
介自持門無私謁有劇賊入境官軍莫敢誰何惠單
車至壘諭以大義賊散去民有田地三百餘頃爲戚

漳州府志

卷之二十二

人物

三十三

里所佔惠奏復之以忤當道歸家貧授徒自給

陳惠字啓順龍溪人成化二年進士授監察御史時
御史楊智疏言吏部與中官交通上怒欲置于理惠
具疏乞宥直言以開言路智由是得免擢知廣信府
居官清慎衙宇壞吏請脩葺惠曰無以我故勞民傷
財僅取小木支架足矣巡行屬邑每自齋糧示毋費
民以二程文集爲道學指南刊布郡中三載卒于官
祀名宦

蘇鏞字仲勸龍巖人成化戊戌進士授河南崇府右
長史本司例有羨餘歲取以千計鏞悉革之汝寧荒

啓王減免庄田祿米民蒙其惠盡心輔導王重之正德改元進階三品亞中大夫鑣爲人和而不流家庭無叱咤之聲鄉隣嘗怨于已者及蹈難反慨然救之所著有浴心遺稿

吳超字華越漳浦人成化戊戌進士授工部主事監杭州關關故利藪超矢志奉公常賦羨餘悉歸公帑清議推之改管徐州洪三年尤以清勤著遷廣西叅議致仕歸家居淡薄杜門自守鄉人有清白吏之稱吳北字子瓌龍溪人弘治庚戌進士初授撫州府推官有折獄才每公出裹糧自隨不勞百姓以不干名

漳州府志

卷之二十二

人物

三十四

譽十年不得調及爲御史直言敢諫有古諍臣風巡按山東卒于官

陳英字石英龍溪人

今海澄

由正德癸酉舉人任滋陽

縣教諭悉心敷教鄒平王重其爲人有月溪正人之贈典陝西文衡陞定海知縣公清愛人尤敦崇正學以爲士人倡自以性直不諧于時致仕而歸郡縣屢請賓筵不出士類重之

鄭復字一陽龍溪人正德丙子與弟臨同領鄉薦初授嘉興訓導師範端嚴督學使者器重之命主五經院長歷任樂清樂昌瀧水三縣尹清以律已惠以愛

民尤執法不撓無所阿私秩滿告歸林居二十年敎授生徒躬耕自給所居不蔽風雨晏如也弟臨任南城麗水知縣亦以清介聞于時

楊表字汝中龍溪人正德甲戌進士授南京戶部主事督鳳陽倉陞本部員外郎中督賦湖廣擢知長沙雷州二府興學校表節義濬水利嘗作文以祭城隍猛象爲之出境郡人異之陞浙江鹽運使浙人稱之曰三十年來離司廉官楊公一人而已陞廣西叅政以憂歸足不履城邑有言及營利者輒斥之以廉介終其身

漳州府志

卷之二十二

人物

三五

林士章字德斐漳浦人嘉靖己未進士廷試第三人凝遠坦夷溫恭下士進講經筵多所獻納纂脩國史以綜核聞爲兩京祭酒士習丕變遷禮部侍郎時江陵柄政諸附之者如蛾赴燭章獨無私謁不致殷勤固已啣之而諸事下禮曹者復多堅持不可江陵大恚嗾所厚科臣論列之太學生羣起噪於言者之門欲唾其面科臣羞沮不敢出旣而有旨勉留尋陞南京禮部尙書三上乞骸得請賦歸卜居于郡北之長橋樓遲二十載卒年七十有七賜祭葬子汝詔萬曆丙戌進士亦以宦績著

林偕春字孚元漳浦人嘉靖乙丑進士由翰林庶吉士歷編脩以直諫多聞稱與脩武廟世廟實錄管理誥勅爲江陵封公撰述江陵欲增改數語偕春執不可曰王言有體不可易也江陵啣之出憲楚臬遂拂衣歸江陵敗錄所廢斥者起兩浙督學所取士多在驪黃牝牡之外始若疑駭後皆懸驗然竟以骯髒自許忤臺使者掛彈章後復起南贛兵備遷楚藩直道難容何往不黜乃歎曰宇宙許大莫能容我惟逃之醉鄉其奈我何遂歸日與故人痛飲絕口不談時政里中有不平事無問縉紳士庶輒怒目苛責不少舍

漳州府志

卷之二十二

人物

三十六

茹人皆曰此古道也林公操此以往屢起屢躓何怪哉所著有雲山文集行于世

王應顯字惟謨漳浦人嘉靖庚戌進士初仕爲秀水令銳意興除轉計曹權九江稅關政肅然擢憲滇南釋冤獄芟孽黨移湖廣叅政分守襄陽時歲饑道殣相望應顯乃發粟賑濟活可數萬人陞浙藩躬節儉慎出納清聲懋績朝野推重遷太常寺卿值江陵憂制奪情部寺各具疏保留應顯毅然曰綱常重事萬代所瞻豈宜阿順以固寵祿持不具疏江陵恨之竟以是拂衣歸應顯起家甚微及歷顯貴家猶故貧布

衣敦樸與故舊談往日斗酒相勞各盡歡去或邑有
是非輒建議侃侃不可奪廉靜無欲淡然以終

盧維禎字司典漳浦人隆慶戊辰登進士授太常博
士擢吏部主事歷考功文選郎中品藻精密拔淹滯
進孤寒凡所舉錯雅符公論廣西僉事陳希美補官
赴京具奏爲御史時以言忤權相非選郎盧維禎主
持公論難免虎口矣遷太常少卿右通政歷太僕光
祿寺卿疏請浙直歲派上供改折及良醞珍羞二署
管糧弊端上嘉納之遷太常寺卿疏請舉冊立大典
言極懇惻陞大理寺卿復疏巡撫李材罪有可矜不
漳州府志

卷之二十二 人物

三七

報陞工部右侍郎改戶部代總督倉場事以忤當道
上疏致仕策蹇出都門蓋年始艾也與朱尚書天球
結社梁山之麓所著有醒後集若干卷卒贈戶部尙
書賜祭葬

張佐治字思謨平和人萬曆甲戌進士初授高淳令
以治行調繁歷長興高明二縣廉明果毅聽斷精敏
所至復能勤恤民隱嘗奉文丈田屏騶從行郊野中
歲旱步禱民德之遷寶慶郡丞及補紹興署郡事併
上虞諸暨二邑清望大起以卓異薦歲大計錫清廉
宴十六人佐治與焉超擢婺州守再補寧波在婺雪

孀婦王氏寃獄定海有盜殺人棄屍江中屍逆流而上隨官舟佐治察之曰此新被戕者賊去未遠遣人急捕遂得之一訊服辜遷寧紹兵備副使尋轉天津兵備叅政時倭犯屬國天津戒嚴所爲桑土綢繆計甚具闢屯田數萬頃以贍軍費權璫重取葦稅力爭之得減十之五竟以勞卒于官佐治天性惻愍而高潔有特操歷官數任垂橐歸里在津門病革官屬入視布被蔬席而已沒無遺貲僚屬治具歸其喪

張廷棟字國材郎中綽之曾孫萬曆庚辰進士授行人後先奉使諸藩贈餉無所受曾道經吳越所知爲

漳州府志

卷之二十二

人物

三六

鹽策御史一賈人犯網其子求一言出朱提爲壽棟峻却之然心憐其父寃明日竟爲白賈寃狀事賈謂御史出之不知乃公力也爲大行十載屏跡權門會聞中吏部郎缺當事將用棟或告棟當趨謝棟不往當事啣之置第二已丑行取以病劇改儀制司主事踰月而卒棟性度深純飲人以和生平無疾言遽色事太夫人至孝有不懌必免冠跪床下母意釋乃止里居未嘗片語請間鄉國有大利弊輒以義爭如議改客兵營于西郊請開城壕疏滯道壅里閭之間至今稱焉

張廷榜字登材與兄棟齊名成甲戌進士令太平慎獨簡任爲民講律令設鄉約簡賦役繕頽圯他不屑屑也暇日課士興文自作程文示之旁邑故多才名無不負笈從太平令遊者竟以不善事上官故擢鎮江丞未幾視篆吳江吳江去潤州數百里盜發潤州界而竟以是貶官已復撫太平事論罷歸築館芝峯鄉人多執經稱弟子老去買一舟入夏乘之聽其浮止里居三十年貞履肥素未嘗干人所著有布鼓初聲盥耳吟若干卷

蔡杲字弘中漳浦人少有文譽與弟昇齊名昇先成漳州府志

卷之二十二

人物

三十九

進士早卒杲登萬曆己丑進士授太倉知州清白嚴介遷南京吏部郎中調考功司考察稱公平擢光祿寺丞光祿故清秩而杲尤自刻勵凡貲郎爲屬員者非公事不敢謁藻鑑明晰尤樂推引善類孳孳不怠奉使冊封尋陞尚寶少卿杲豐頤脩髯神氣適上亭亭物表先後僑寓京邸五六載未嘗携家時栖止道院僧寮一榻蕭然交無雜賓卒于京貧無殮友人爲經理其喪以歸

陳以珪字思禹海澄人主事映之子萬曆戊戌進士授太常博士明通淹邵行取爲同官之寇遂註禮部

主客郎以珪在廣衆中軒若朝霞而性謙抑訥訥然如不出口每事有疑滯衆問陳公云何輒先謝不知然後論列有饒州別駕陳奇可以忤中璫死詔獄無敢視者以珪獨往經紀其喪時論高之以疾甚告歸卒於瀛西舟次年不竟志世甚惜焉

續傳

曾應棨字若槐海澄人萬曆辛丑進士初爲戶部主事歷數轉皆外任累陞雲南按察使爲人和厚質寔方在部日時與老成規曹務日不暇年少者輒笑之謂之迂應棨不恤家居或詢在官善政則曰供職幸無罪何足言者六八都土腴而苦鹹鄉紳鄭應龍倡

漳州府志

卷之二十二

人物

四

築陂通九都水利未成應棨繼而設閘時其蓄洩苦鹹者歲稔焉民立碑誦之

蔡思充字保卿漳浦人萬曆丁未進士初授東陽令有廉名何喬遠贈以詩云東陽爲令幾多時不取民間一寸絲已酉分考得倪元璐于穉齡卒爲名臣擢刑科歷禮工戶科給事中晉工科都給事陞太常光祿二寺卿以議許世子不嘗藥觸璫怒告歸尋起南太常卿陞刑部侍郎上疏極陳科場關節蘆州蕪湖關數大案辭義激烈凡出入輕重多所平反晉大司空始終以清慎自持致仕歸至莆陽卒給祭葬贈太

子少保

陳天定字祝皇龍溪人與相國林文穆爲中表嘗師事之天啓乙丑成進士遭魏璫方張不釋褐而歸日與友人談經史操時藝選政海內操觚家多宗之而陳氏說書尤盛行于世會漳中不靖二十四將躡海濱窺于郡郡守施邦曜與共商捍敵之策天定繕鄉兵輕衣治戎自城以東皆主之築土堡於鎮門兩岨以固郡圍賊嘗一夜以輕舟泊浦頭天定乘月黑要之賊幾不得出自是不得內犯歲復饑天定捐貲勸賑聚米分恤活饑民無數民爲立碑紀其事崇禎辛

漳州府志

卷之二十一 人物

聖

未璫燄旣熄始廷獻授官行人時東林太盛天定憂之嘆曰奈何以此賈禍然竟以黃漳浦故繫獄旣得釋召補銓衡未幾林文穆卒遂請護喪以歸甲申後遁迹花山僧衣褒帽放言自廢以貧困終著有陳氏說書及慧山詩文全集若干卷行于世學者稱爲慧山先生及門方進棄諸生偕隱終身人稱高節云

論曰慧山出處幾于和矣不隱賢不枉道迨於晚節褒衣自廢其間柳下之風乎慧山常恐東林賈禍而已竟以漳浦繫獄同道爲鄰寧必黨耶慧山不黨而羅黨禍世猶以黨譏君子也謬哉

論曰世之所謂清介者豈徒清脩自好介然不牽流俗哉清則廉介則慎廉與慎厥品著焉立人本

朝勢利不污其志廉慎以成乃勲其亦可謂不愧
不辱者矣

才能

林瑜 陳璽 黃嵩 王玘 陳鐔

吳森 林同 陳爵 吳瓌 陳奐

曾逸 張壇 王龍 陳和 徐鼎

林功懋 謝彬 王命爵 王會 柯應鳳

韓濟 胡士鰲 黃日謹 陳一洙 林宰

林瑜字子潤龍巖人洪武中以貢選五軍右斷事聽
斷稱旨陞江西僉事贛有豪以逋負殺民妻以賄移

漳州府志

卷之二十二

人物

四十一

於其姪獄具瑜加察焉寘姪而罪豪安福有盜數十
人連歲逋不獲朝廷罪逋盜者以瑜代瑜跡盜所在
掩捕悉得之陞本省副使時湖廣長沙寇聚滋蔓及
袁吉豐城候發二省兵捕寇檄瑜撫脅從者已而渠
魁就擒脅從之黨復叛瑜曰此危疑也復推誠撫定
之歷三考陞浙江左叅政踰年掌司事適吏舍夜失
火延燒公署及官文書事聞治失火者遂并逮瑜未
幾卒瑜居官二十年自奉無異韋布和厚樂易用法
平恕所至禮賢下士卒祀鄉賢子京別有傳
陳璽字尙勉漳浦人正統元年進士授戶部主事遷

吏部考功郎中考覈殿最稱平時瓦刺犯邊疊作備邊禦戎策以獻陞廣東左布政使召至內殿賜宴以行時廣當劇賊之後官軍疲于戰守民苦供億疊且撫且捕遂降新興德慶蓬州諸賊地方以寧旣而以疾請告歸其子嘗買親戚田疊召謂之曰某丈貧甚若可取其有耶破券還之其父嘗從胡宗華遊宗華之孫貧疊以女妻之植其家論者乃以疊爲仁厚長者也疊爲文章典雅尤善於詩所著有梅菴存稿經籍要覽若干卷

黃嵩字中正龍溪人正統己未以歲貢授廣東都司

漳州府志

卷之二十二 人物

四三

經歷時廣寇作亂軍務煩興嵩經理有方嘗上三章乞除弊政皆見采行當道交章薦之景泰間擢平樂知府平樂故彘地徭獍叛服不常嵩以德撫綏之彘落宴然屬恭城徭叛嵩約民爲戰守具賊聞有備乃解去復徧歷諸寨洞勸諭悉降之九載秩滿士民保留復任三年乞致仕民遮道涕泣如失父母卒年八十一

王玘字弘璋南靖人正統戊辰進士初授禮部主事歷戶部員外郎監督淮安糧儲出納維公而同事中使欲擅權侵利玘按其事將劾之中使懼而止遷郎

中九載考績擢雲南右叅政未任以親老乞終養父沒哀毀成疾而卒

陳鐔字曰宣漳浦人景泰庚午舉人授太原通判清慎自持督民兵守禦邊境與士卒同甘苦秩滿民立石頌焉陞徽州同知改嚴州案無留牘民無冤訟以廉能聞年七十致仕

吳森字以時漳浦人天順丁丑進士初授禮部主事歷浙江叅政廉靖自守而以公勤濟之守紹興等郡徭役較丁糧多寡爲輕重貧富適均江山草寇負險弄兵幾三年森設法捕之民賴以安在浙十餘年凡

漳州府志

卷之二十二

人物

四十四

所設施皆平恕寬仁之政百姓懷之

林同字進卿龍溪人天順庚辰進士授工部主事歷戶部郎中撮錢穀樞要作指南錄嗣政者皆以爲便成化庚寅保定饑奉勅賑濟明年擢江西左叅議權貴請托皆格不行弘治庚戌賊掠大府檄同偕總兵官馬俊禦之賊平陞浙江右叅政督理糧儲力革其弊陞廣東布政使條示利病二十餘事督郡縣行之又勸民行呂氏鄉約及文公家禮年七十上疏乞骸骨詔許之同爲人柔外而剛中勇於爲義嘗請郡縣移建觀瀾書院于文山之麓塑朱子及四配像仍置

祭田以脩祀事自出貲作大宗祠以合族人居官口
十年祿入隨散卒之日家無餘貲

陳爵字良貴南靖人天順丁丑進士初知揭陽縣嶺
南盜起爵親詣賊廂諭之不從爵度賊且至乃築城
鑿池環以柵爲守備計未幾寇大至爵躬擐甲胄爲
士卒先賊知不可犯乃引去事寧招撫良善抑強扶
弱勸農桑興學校民愛之如父母守臣上其事擢知
韶州府以憂歸改高州府未一載而卒揭陽之民立
祠祀之有邑民王廷烈者自輸田五十畝以供祀事
吳瓌字仲偉漳浦人今平和今平成化五年進士授南京駕

漳州府志

卷之二十二

人物

四十五

部主事進員外郎部檄催督應天等郡陪償種馬瓌
奏蠲其不能償者轉庫部郎中擢貴州叅議以平寇
功遷雲南叅政奉勅整理鹽法先是撫臣奏稱黑白
安寧等井私鬻久通揵和灰泥等弊致客商解體瓌
至乃懸明禁洗宿弊鹽法復通陞本司右布政使土
酋黎姓者弑其叔而奪之位時議欲寬假之瓌執不
可竟置於法以外艱歸卒于家瓌性質儉與鄉人處
無異隱約時沒之日遺橐蕭然邑里稱歎

陳奐漳浦人成化乙未進士初授工部主事陞員外
郎監濟寧閘并督北畿山東河務俱以才幹見稱弘

治庚戌沿邊告警軍糧匱乏乃改與戶部郎中奉勅
往督之與催督有方應期而辦陞貴州叅議時都勻
寇起當道命掌司事徵發及時糧運不絕軍賴以濟
賊平以疾乞歸卒于家

曾逸字世超龍溪人成化丁未進士授工部主事陞
員外郎治張秋河及興錢塘水利皆有功復上疏言
便宜遠計劉尙書璋深器重之後以養病歸丁母憂
未幾卒逸恬于仕進家甚貧居鄉謙謹人咸愛敬之
張壇龍溪人成化丁酉舉人初授廣德州學正時知
州以事繫獄有僞捧檄來代者壇謀州佐縛之以異
漳州府志

卷之二十二

人物

罕六

績陞青州通判九載滿考擢大理府同知麓州寇叛
數年壇至單車宣德意寇遂納欵以功擢刑部員外
郎奔父喪過于哀戚卒于家

王龍字虞臣龍溪人昇之曾孫應弘治九年貢授四
會丞民有叔姪訟者令具衣冠行家庭禮因感泣悔
罪邑民化之隣邑開建多盜當道廉其能檄署邑篆
龍設策平之招撫逃移復業者數千人擢知英德縣
尋以外艱歸服除補任乳源捐俸貲以脩學宮歲饑
出粟賑民全活甚衆邑有虎患龍爲牒告城隍虎不
傷人年七十致仕歸龍弟澤嘉靖二年貢授思州府

推官陞梧州府通判當道累檄採大木勘坑治詞度
戰艦兵餉事畢舉以勞卒于官

陳和字廷雍龍巖人弘治己未進士授桐廬知縣擢
南京監察御史按治有聲遷河南僉事撫民平寇尋
以功陞山東副使備兵徐揚等處所至問民疾苦折
獄明允未幾以疾乞歸嘉靖間起補湖廣副使未行
卒和志趣高潔清儉恭謹卒之日貧無以爲殮桐廬
封丘之民咸立碑思之

徐鼎字思重漳浦人嘉靖庚戌進士初令臨川清虛
糧均徭役崇學校卹犴獄擢南京戶科給事中轉北

漳州府志

卷之二十二 人物

四七

禮科乃疏陳六事復劾諸大吏弗飭者中外肅然陞
工科都給事中卒于官鼎耿介雋朗不逐流俗奉二
母無間言捐貲贍族有范希文之風嘗奉使過里中
邑歲荒會有征饒之役民苦供輸貽書當道乞許民
分給續運復上疏議追浙省原借糧銀紓閩中官民
之急而年不滿德施不竟才識者恨焉臨川人旣祀
之名宦而浦人亦祀于鄉賢

林功懋字以謙漳浦人登嘉靖壬辰進士授東莞縣
才識明敏遇事決斷嘗委權番舶峻却私賂有巨寇
許桂旣降而恣斃之于獄陞南京戶部郎擢知鎮州

府時巡撫朱公統操法嚴切功懋濟之以寬展地行
宜遷四川按察司副使備兵松藩有邊將何卿恃功
驕恣懋以法繩之不能堪遂致蜚語告歸家居十餘
年隆慶改元起補山東副使尋陞河南叅政轉廣西
按察使未行卒于官懋爲人瑰岸廓達有大節每慷
慨論大事歷如指掌好善樂義鄉人稱爲長者子士
弘有傳

謝彬字文華龍溪人

今海澄

嘉靖甲辰進士授南京戶

部主事管揚州鈔關祛積弊尚寬平及遷郎中修部
志稱良史才出爲廣州知府州有冤獄累年不決立

漳州府志

卷之二十二 人物

四六

昭雪之擢山東憲副部轄曹濮當四省之衝盜賊盤
糾設法懸賞分兵布伏諸盜後先就縛東土晏然時
分宜胄子請托不遂啣之乃罷歸郡守羅公青霄以
脩郡志托焉性孝友撫育三弟分俸與其鄉人高其
行誼著有愛吾堂摘稿藏于家

王命爵字仁卿南靖人嘉靖乙卯舉人父爲饒賊所
擄命爵入賊巢求身代父賊感其孝兩釋之初授密
縣教諭遷廬江令清革馬稅及却常例金遷南京兵
馬司以治獄不冤績最擢韶州同知從征羅旁築西
林城有功權南雄關稅一塵不染兩臺交薦加四品

服俸蓋異數也嗣陞廣西太平府知府陞兩浙鹽運以母喪歸復除河東積羨悉歸官帑歲款捐俸賑饑所全活甚衆致政歸家年八十卒家貧稱貸以殮無媿古廉吏焉

王會字延亨漳浦人嘉靖甲午舉人由太湖教諭國子監學錄以師範稱擢知道州招撫叛徭適三廣大征兵使者邏得避兵者八十一人曰盜也下州訊會察其寃上牘言諸人皆挾斧鋸入山鬻技者不爲盜使者怒繫胥役刑刼之會不爲動八十一人者竟得釋時急捕逸賊龔廷虎等兵使者授意令斬降徭

漳州府志

卷之二十二

人物

四九

鄭虎僑等五人頭以當廷虎不者且得罪會謝曰吾不能殺降人爲盜具牒求去遷曲靖府同知攝府事率屬嚴正勘黔國夫人奏沐朝弼謀奪公爵事責朝弼不宜事嫂少恩而治其細人離間者勳爵竟定時征土酋那鑑布政徐樾隕于軍會爲收散卒護輜重以歸人服其才攝守入覲事竣以親老乞休林居屏跡公門著述自娛有北雍春陵滇中歸田集建文野史漫齋筆談若干卷

柯應鳳字文徵龍溪人嘉靖癸卯舉人爲珙縣令珙隣鎮雄土酋往往與民爲難憚鳳威名稍戢陳萬兒

者寃獄也鳳訊得其寃狀力爭之竟以此忤當道意
調會同令會同稱盜藪鳳始至召鄉三老若干人別
置一處給帑筆書盜主名衆所共指者逮置之法境
內肅然民苦徭役委曲區置民賴稍蘇凡三署旁邑
篆廉能聲籍甚擢鳳陽別駕會守缺攝篆庭無滯牘
以憂去補惠州劇寇李文標據巢以叛所部鼎沸鳳
單騎往諭之盜涕泣解散後以入覲事竣間道抵家
遂杜門不出卒

韓濟字克濟龍溪人萬曆甲戌進士授工部主事覈
物料督戎器却常例金旋丁內艱起復補刑部郎出

漳州府志

卷之二十二 人物

五

守河南政尚平恕至持法則守正不可奪潞藩請地
力止之宗室祿米有虛糜及屯糧宿蠹者悉爲釐革
歲饑開倉賑焉以外艱歸復補武昌擢湖廣副使理
蘇松常鎮四郡糧儲兼督支河省費巨萬時有爲蜚
語誣諸貴游子弟聚集亡命將爲變當道急索按之
株連鼎族濟力持不可曰是輩醉飽狂妄瞋目語難
爲豪耳無反跡不宜深求久之事漸冰釋不者且構
成大獄禍烈矣遷楚藩叅政以勞瘁成疾乞歸歷仕
二十餘載未嘗營家人產里居片宇不至公門在武
昌積贖鍰二千餘金悉捐脩廟學懸橐出郡卒于家

胡士鰲字爾潛詔安人憲副胡文子也萬曆丁丑進士授江陰宰有駿聲入爲計部郎持節賑畿南諸郡全活無數出守武林士附民懷以忤當道奪職爲登州二守東征備禦所籌畫爲多遷青州守適礦瑞陳增橫暴三齊益都尹吳宗堯被逮士鰲義形於色曰守令一體也令逮何以守爲資其行旅護其屬出境揭政府部院爲令白寃增聞之遂并構焉有旨降河東運同自是臺省屢疏士鰲才品銓曹屢推用俱不報遂賦閒居士鰲少負經世才不可一世而詞藻翩翩足列作者之林名實未究識者悼之

漳州府志

卷之二十二

人物

五十一

黃曰謹字元祗鎮海人萬曆丁丑進士授工部主事分司清江浦以羨餘賑饑施藥遷郎中治孟城河條上兩疏時稱確議擢廣東副使理鹽法振刷弊蠹商民頌德轉叅政分守南贛調停稅使地方安堵陞本省按察使入覲值足疾當事者捃拾之改粵叅政復入覲輯金鑑錄數卷將以獻道卒蘄水曰謹內行淳備兄早卒事嫂如母撫四姪如子居鄉好行其德往者衛庠初建賦已額定士廩第列虛名無半菽之露曰謹力陳之郡守劉公志業請以衛官員缺俸充之歲支米二百四十石復置海頭港稅以資學宮之費

以俸金遍給庠士百餘人闔衛德之

陳一洙字國潢漳浦人生而穎異年十九舉於鄉登萬曆丁丑進士持已當官公正廓落無所阿私所至皆有嘉績初令靈川遷計部司通儲權吳關所經營度支課務釐革爲多事事俱便商民賢聲大著擢憲副躋總臬所閱歷江右楚蜀憲度風清吏民畏懷其慷慨任事爲地方計長久確有碩畫兩臺屢薦剡適爲忌者所中遂掛冠歸居家孝友承歡均財諸弟尤人所難云

林宰字德衡漳浦人萬曆辛丑進士授無錫令歷陞

漳州府志

卷之二十二 人物

五十三

四川布政使寬以得民而事必躬親不假手胥吏樊龍樊虎之變親援枹鼓以勵將士密召女士司秦良玉設計擒之陞太僕少卿核馬政諸弊賜銀綺者三嘗分典鄉會試得士如鄒之麟耿如杞等皆一代名豪識馬太史世奇于童子試中時稱具眼以南兵部左侍郎致政在鄉里無貴倨容與父通政使梓俱享百壽

論曰士不能佐天子亮工熙績則民牧貴耳民牧者與民甚親施澤甚易受人牛羊求牧與芻非其任也豈以梯榮明白林瑜以下皆有能績以及於

世矣大都以民牧著者為多舊志豔稱王會以一官爭八十一人之命然則將舍八十一人之命以求一官世亦豈有為之者乎嗚呼一方之命懸於司牧寧獨八十一人哉可不慎耶可不戒耶循良

陳孟貞 朱 珪 戴泰一 顏 寶 王 昇

林 元 蔡 浩 丘 昂 鄭 和 俞 文

楊 叅 戴 琇 林 謙 黃 熒 戴 昀

許 潛 徐 弼 陳 璜 趙 渾 周 振

杜 表 謝 傑 張 觀 顏 階 張 賀

漳州府志

卷之二十二

人物

五三

洪 哲 黃 玠 陳 令 鄭 要 葉 疊

林 策 王學孝 吳宗熹 陳九德 黃季成

陳奇可 陳維貞 劉庭蕙 林明順 李 棠

張一棟 陳 錦 蔡方平 柯 彥 李瑞和

柯元伯

陳孟貞龍溪人宋正獻公俊卿之後洪武二十二年以茂才薦廷試第二人授知州轉河東鹽運使司永樂六年召赴京尋命知金華府事九年疏請還家洪熙元年詔賜月米一石終其身年九十卒居官廉潔始終無玷姪或永樂三年由應天中式亦以公勤明

恕傳或子舒自有傳

朱珪龍溪人永樂元年郡守錢古訓以耆老薦授鄒縣知縣公勤廉幹賦役均平秩滿邑人奏留者再卒于官爲築墳立祠而歲祀之

戴泰一龍溪人性行敦篤永樂元年以茂才薦授和州知州恪慎有爲以清白稱被誣得辨改知均州二十年卒于官

顏寶龍溪人永樂丙戌進士知四會縣溫厚公正寬猛得宜奏除詭名田糧九百餘石復申除鄉民鹽鈔一十二萬餘貫尤加意學校新其廟宇至于橋樑圩

漳州府志

卷之二十二

人物

五十四

岸之屬亦悉意繕治當道交章舉薦稱爲嶺南獨步云

王昇字日初龍溪人永樂甲申進士選庶吉士授安福羅田令俱有惠政補平涼府推官陞大理評事歷左寺正多所平反以場文貞薦知撫州府爲政一以惠利爲本重學校興禮教年饑捐俸賑濟全活數千人九載當遷撫民詣闕借留朝廷乃進昇正三品階使復任以從民望二年以疾辭歸初昇在郡庠教授陳思賢被逮赴京以金寄昇無有知者思賢死昇遣人齎金歸其家子彞別有傳

林元龍巖人宣德間貢士授潮州府推官審獄明允嘗釋無辜者百餘人稱曰于公復生以憂去起復改贛州府釋龍南良民爲賊誣者十餘家卒于官

蔡浩龍溪人正統甲子舉人計偕北上邑博劉裒寄百金歸家浩至三山聞裒訃卽奉金以歸其孥或告以試期迫浩曰功名事得之有日死生之際安忍相負知瓊州府興利除害愛民如子瓊人思之嘗爲御史亦抗直有聲

丘昂字致謙龍巖人正統五年貢太學授岳州府通判賑饑有法民賴全活奏免累年逋稅千餘斛以外

漳州府志

卷之二十二

人物

五十五

艱歸起復補任楊州府時奏築本縣城并調官軍守禦至今巖人德之擢順天府治中致仕母章氏年九十失明昂朝夕扶持不離者數年俸餘悉以脩先塋立祭田及置第宅與弟姪同居毫不以私

鄭和字肅雍龍溪人正統十三年進士授戶部主事管天津倉出納有法陞郎中與脩英宗實錄陞雲南布政司叅議所至備詢民隱因俗爲治滇人頌之奉表入京卒於旅舍和天性樸厚與人言若不出口自奉淡素無異儒生事繼母以孝聞見人善稱揚不置聞人惡閉口不談人以是稱其長者

俞文字懋學漳浦人正統間應貢入國學遭喪歸時
閩寇縱橫村落居人皆入城邑文獨爲父治塋西峯
之野會大帥統兵至儒冠謁轅門盛言王師吊伐請
戢兵無暴掠帥然之景泰癸酉謁選授常州府照磨
廉介正直監司有不決疑獄檄文治之民有夜懷金
入謝麾使去卒亦未嘗以語人督漕徐淮間峻却常
例金在任八年疏老乞歸吏民攀留釀金爲驢文覓
小舟夜亡去家居蔬食怡然自樂鄉人士相與號曰
正菴先生毘陵祀名宦

楊叅南靖人景泰元年舉人授江西南豐知縣講學

漳州府志

卷之二十二

人物

五十六

好古清勤自勵一毫不苟取于民入覲遂以母老辭
歸時已遷貳守竟不就母沒廬墓三年家居蕭然足
跡不入公門

戴琇漳浦人成化十年貢卒業成均選松江通判訓
民以禮葬埋撤淫祠十餘所清僧道去僞牒百餘人
使民急于公賦又以漳晒鹽法教上海灶戶俾鹽課
早登歷任七年卒于官行李蕭然民廟祀之

林謙龍溪人成化元年舉人任盱眙令廉平不擾捐
俸賑饑餒贖悉報官貯庫毫不染指陞高唐州同知
盱眙舊民相率往問安否在州尤多惠政致仕歸卒

于家祀旣昭名宦

黃熒字敦實龍溪人成化壬辰進士授玉田知縣邑故衝要民疲熒以節愛撫之流移復業擢南京監察御史丁艱服除改北臺條官民利病十餘事上嘉納之出按長蘆釐鹺政宿弊再按雲貴鎮以簡靜擢四川副使母老致仕歸居喪哀毀有羣鳥遶屋之祥晚年清節益勵不入府城課子弟誦讀而已壽九十五卒

戴昫字正中長泰人磊落任真成化甲午登賢書授樂清令破觚斲雕務從長厚嘗築陂灌田萬餘頃名漳州府志卷之二十二人物五十七

為樂昫陂然侃直不能曲承上意竟棄官歸子貴益敦樸如布衣敝裘羸馬人不識其為封翁也

許潛字時昇漳浦人

今詔安

成化四年舉人知平樂縣

加意學校復招撫洞獠以免戍守之害聽斷公明訟息民服居官貧甚囊無餘積卒于官子判孫選俱舉孝廉仕以清白世其家

徐弼字良佐漳浦人成化庚子舉人授海陽知縣政尚仁恕脩復陷潮大堤以興民利改保昌為民蠲無徵米千餘石當道累薦遷梧州府通判時逆璫用事恨弼不為賂勒令致仕後瑾敗起判漢陽攝府事修

廢舉墜以德化民民有江水江月之謠擢廉州府同知踰月卒弼性勁直不能詭隨以冰蘖自持卒之日發其篋得德政錄若干卷而已

陳璜字朝貢龍溪人成化癸卯舉人授江西樂安訓導遷浙江龍游教諭嘗與脩憲廟實錄歷廣西順天廣東同考官所取多名士擢廣西全州知州陞廣州府同知剽繁治劇綽有能聲擢南京戶部員外郎過家省親卒

趙渾字伯全漳浦人成化十七年進士歷戶部郎出知雲南思恩雷州三府廉介自持決獄無冤遭劉瑾

漳州府志

卷之二十二

人物

五十八

之禍致仕歸家四十年不問戶外事年八十餘卒

採

書及縣志補入

周振南靖人弘治元年貢授香山訓導素行敦篤在香山日捐俸脩葺杏壇構樂育亭以聚徒講授香山人祀于名宦陞感恩教諭致仕歸日以禮義訓其鄉

人

採縣志補入

杜表字廷標平和人弘治八年舉人知金谿縣清慎誠愨愛民如子正德壬申江西巨寇攻城表樹木柵募勇壯設方略與民死守之邑賴以全丁外艱服闋補任海豐加意撫綏流移復業後遷廣東都司經歷

以母老乞歸養卒于家

謝傑字洵卿龍溪人

今海澄

弘治丙辰進士知泰州敷

政平和不苛不縱嘗築金堤四十里以通水利尤崇學政建學宮增齋舍費不及公帑擢南雄府同知

張觀字國賓龍溪人正德二年舉人授休寧訓導以材望知柳州執法嚴明存心寬厚時民苦旱觀自責躬禱甘澍隨應歲饑發粟賑之境有巨寇設法捕之州民獲安內艱歸絕意仕進居家孝友睦族母死貧不能喪郡守孫公裕給地捐貲助之

顏階字崇升龍溪人格之孫幼孤力學行誼有聞正

漳州府志

卷之二十二

人物

五十九

德中以鄉薦授香山教諭首建遷學之議毀淫祠爲社學嘉靖初與修武宗實錄擢貴州印江知縣都御史徐問疏其治行第一兩任俱祀名宦陞楚雄府同知擢南京戶部員外郎致仕歸家杜門不出清謹自持以名德爲鄉邦推重有文集若干卷行世

張賀字國儀龍溪人

今海澄

正德五年舉人授寧海教

諭遷松陽知縣政尚清簡不爲煩苛脩廟學建橋樑節公費均徭役聲稱蔚起丁父憂歸築海堤以興民利及倡募義勇以遏流賊鄉人賴之服除補景陵縣甫半載以忤當道告改永州教授卒於官祀松陽名

宦

洪哲字用晦龍溪人正德丁卯舉人初任金華教諭
遷知祁門縣扶善遏惡民愛之如父母擢紹興通判
革常例築海寧堤岸民以為德署篆餘姚遷潮州府
同知及歸脩宗譜增祭田捐已田以贍其兄迎養二
姊二十餘年葬外氏不能舉者數喪鄉人稱為長者
黃玠字孝徵龍溪人嵩之曾孫正德庚午舉人授漢
川知縣平巨寇陳大經等民賴以安再知平樂縣旁
邑民饑發金助其賑濟全活甚眾遷石屏州知州陞
魯府長史匡輔以正陳政要十事立宗約三十六條
漳州府志卷之二十二人物

卒

王敬憚之已而乞歸居家敦倫睦族為鄉邦所重

陳令字汝申龍溪人

今海澄

正德丙子舉人為廬州別

駕為民興利除害以剛直忤上官調江西斷事尋判
潮州值漳大饑資潮粟以濟潮民閉糶甚嚴令力請
於當道開其禁漳民賴以活者無數羣勒碑於縣門
及致仕歸修墳墓建祭業立大小宗祠以祀祖先設
義學以訓鄉之子弟卒祀廬州名宦令有子曰順之
知荆門州亦以廉能著績州人特祠祀之至今靈應
猶朔望頂禮弗絕也

採閩書及縣志補入

鄭要字武階海澄人以乙榜為廣文歷東陽雲夢興

寧三縣令簡易近民而中精敏其在東陽被調也邑人詣闕乞留者再去雲夢三年復取道故所部吏民遮道送迎醵金爲贈一無所受立祠祀焉

葉亶字世黽詔安人少孤力學博洽羣書正德十六年進士上書乞追母服廬墓三年授南城知縣有惠政陞都察院都事轉經歷時鄉人奏設詔安縣亶在京師有力焉陞河南僉事歷廣西叅政以年老致仕先是詔安版籍爲漳浦胥吏舞文遺害甚劇亶率父老詣府面白其事竟得改正鄉人德之

林策字直夫漳浦人嘉靖戊戌進士授蕭山知縣有漳州府志

卷之二十二

人物

十一

聞家堰北捍浙江內引湘湖爲田數萬頃舊築以土輒壞策至悉易以石立法蓄洩蕭人永利政暇則進諸生講道術課文藝陞大理右評士轉寺正遷江西僉事丁父憂歸卒于家

王學孝字欽求龍溪人昇五世孫也領萬曆癸酉鄉薦授定遠教諭丁內艱服除補蕭山教諭以古道倡率諸生陞衢州府推官署郡縣事清操愈勵歲饑親履閭巷設法施粥勸民平糴所全活甚衆以外艱歸服闋補高州理攝郡事時苦旱齋素步禱烈日中夜則燃燭視事拮据焦勞疾作遂堅意乞歸家居孝友

姍睦鄉族化之事繼母尤謹云

吳宗熹字伯焜南靖人幼稱奇才年十九舉于鄉捷
庚辰進士授海寧令以儒術飾吏治拊循惠愛獄訟
衰息然性醇實不能睨上官色竟爲當事所中改教
景州尋遷國子丞再遷工部主事大司空曾公同享
嘉其才守辛卯主試粵西所錄多名士還朝請休沐
抵家而卒年方三十有二

陳九德字楸夫鎮海人萬曆癸未進士爲秀水知縣
挾兩蒼頭以往蕭然韋布容也催科不尚鷙擊治獄
得情旁邑慕其清正皆願質成以積勞成病卒于官

漳州府志

卷之二十二 人物

三

百姓哀其貧爲捐貲治具祀名宦

黃季成漳浦人萬曆己丑進士授東陽令邑民素健
訟季成當兩造曲直盡得其情刁風息焉以外艱歸
旋擢爲工部主政分筦鑄造局局故繁瑣而頗涉利
竇季成一以淡泊處之嚴飭家人禁絕常例卒之日
橐如懸磬季成天性坦夷廉而不劇東陽之政久而
益思有才未竟其卒也士論惜之

陳奇可字仲卿鎮海人自爲諸生時慷慨鯁直常赴
人之急萬曆辛卯歲薦爲選授饒州府通判兼理審捕
時中貴人潘相方橫諸奸多盤據奇可一繩以正燒

造夫馬之費悉從裁減潘璫啣之會入郡署事數月璫鞭撻鎮民不勝毒楚遂衆噪焚厰奇可適於是日抵鎮噪者復大呼曰無驚動厰東陳通府也璫益愧且怒遂中以鼓衆倡亂奏入詔遣官校逮之兩臺交章論白竟下錦衣衛卒于獄同鄉太常陳以珪倡義經紀其喪兩臺疏請賜葬不報海內聞而哀之

陳維貞字念蓋龍溪人萬曆甲辰進士授戶部主事奉差鈔關河曲加意商旅革陋規以忤權貴謫肥鄉令再謫鎮江府廣文擢國子助教卒

續傳

劉庭蕙字雲嵩漳浦人生五月而孤母陳氏冰操撫

漳州府志

卷之二十二

人物

六三

育萬曆庚辰成進士授新昌令邑有虎爲文祭之虎越境去歲旱開渠灌田民賴以濟陞廣西叅議時沙郎不賓蕙以數騎直入其地諭以大義皆革面督學滇池大得士心後以冊封事與僚佐爭論不合解組歸庭蕙生平至孝嘗伏闕叙母艱貞有人間哺兒以乳臣母捕兒以血臣登科第母不及見臣操升斗母不及養等語神廟可其奏立坊旌之著有一畝宮存

稿續傳

林明順字孝臣海澄人性剛介人多憚之登崇禎庚辰進士授廣東翁源縣調繁增城署東筦陋規革除

殆盡三邑民祠焉筦多盜明順肩輿入賊壘爲開諭
禍福賊留之三日民以爲將危之也輸金贖之而賊
已擁令輿至矣乃以其金分脩學宮整治橋梁行取
除御史奉勅典試粵西經故治父老歡迎擁道鼎革
後隱郡北桃林不出鄭成功入郡諸富紳以徵餉故
累囚相對獨明順與陳天定兩人不與云

續傳

李棠字英菱平和人萬曆乙酉舉人授長寧令會礦
使憑陵立置不法者于獄旋攝興陵多奇政遷衢州
判秩滿擢留都治中定溧水縣運卒之囂剖相國汚
水利之界脩社學理學田他如鹽法鑄錢之類脂膏

漳州府志

卷之二十二

人物

六十四

不染其卒也祀名宦

續傳

張一棟字任甫平和人萬曆丙戌進士初授新興令
調繁番禺直指蔡夢說首薦行取道經省城以不謁
巡撫因索其途中責驛夫事以輕躁揭之遂掛部議
改徽州府教授未幾遷南京助教一棟曰吾兩任廣
文未能以文自廣奈何乃與祭酒楊起元較刻十三
經二十一史進推南計部秩滿轉郎中未幾出守平
樂時平樂礦璫方春藉取礦遍蹂民田一棟杖其爪
牙而遣之踰年左遷補兩淮運同疏陳鹽議甚悉旋
轉守肇慶以丁艱歸乃築別墅于南山之陔悠然自

終祀平樂名宦

續傳

陳錦字端寔漳浦人萬曆癸未進士家貧力學性純樸不苟言笑亦不輕毀譽人嘗師事朱淡菴步趨必飭淡菴每稱之令海康醇謹如儒生政尚廉平務在安全而已稍遷刑曹郎十年不得調宦况蕭然處之坦如擢松藩憲副率屬撫民頌聲四起卒于官萬里歸櫬鄉人哭迎之數十里外

蔡方平字君衡詔安人少孤恆于百里外教授負米以歸養其祖母及母萬曆六年貢為淳安令歲饑民嘯聚平乃請上官發倉賑之先是邑有流人誣伏盜

漳州府志

卷之二十二

人物

六十五

更數令無異辭平至得其冤狀遣之然竟以廉左遷

卒祀淳安名宦

採縣志補入

柯彥字君求龍溪人崇禎戊辰進士初授合肥知縣修河流灌田民賴之補任進賢知縣理劇修備陞戶部主事轉員外纂修漕政實錄外遷湖廣按察司僉事未赴任卒彥性孝友淡泊自處公庭絕無請托

採通志

李瑞和字寶弓漳浦人崇禎甲戌進士淹博豪邁不脩邊幅為治蕩滌煩苛簡易近民初任松江司理時知府方岳貢政尚嚴肅瑞和濟之以寬訟獄多所平

反然才識明敏人亦莫能眩也在郡七年松人塑像
生祀之見松江府志名宦傳尋拜監察御史巡視中城奉讞陳
新甲獄稱旨視鹺兩浙革除夙弊丁外艱歸家居四
十四載竟不出每歲歉輒平糶濟荒且周其貧乏浦
人德之所著有牆東集學夫詩黃道周爲之序

柯元伯字康侯龍巖人崇禎辛未進士授東陽縣有
善政考最擢戶部主事署雲南司度支有條召對稱
旨擢河南道御史巡按陝西茶馬時秦中流寇蹂躪
商人失資引伯詢病設法疏通三省軍民數十年積
窳馬政茶法一一剔清轉汝輝兵備道卒于官嗜學

漳州府志

卷之二十二

人物

六

樂引接後進紳士多儀型之續傳

論曰國僑有言太上者惟能以德服民其次莫如
猛顧古來多以循良著績何歟治亂民須用嚴治
良民須用寬國僑之言爲鄭也吾未見鷹鷂之勝
鳳鸞也故因前志所紀循良列傳而廣之詩曰愷
悌君子民之父母

